

四庫全書

集部

欽定四庫全書

明文海卷十七

餘姚黃宗義編

賦十七

山川九

遊峨賦

來知德

春到草堂陽回瓦屋王壘之積雪方消灩澦之孤根漸沒
客有紉五芝之秀纓九畹之英傲墳素之邃圃飲往獻之
清芬識風雲之變態詠雅頌之徽音睂蓬壺之岑寂繆日

月之飈奔乃拗枯桐戒力從遂奮袂於蟠龍更馳突於鍊
鳳瘳扁舟而逆水兮歷忠涪而平都憇宣公之忠懇兮靈
丘空嶢嶢而榛蕪入釣深而仰止兮卓承學之刑模羌妖
廟之誘民兮走九坑之芘狐跣塗山之嶢峭兮貼賈辨於
斯須涉凡水之潤泊兮驚清夜之將但望寶峰之巖從兮
哀履霜之伯奇彼先童之克勵兮終劉仙之可疑迺緬
避世之楚狂兮甘梓茹於落莫豈知鳳德之未哀兮斯
道萬年而振鐸憩大峨之卧石兮斟玉液而小酌披古

字之苔蘚兮蟠蛇蚓於雲壑及經三望更歷雙飛奔雪
濤而礪錯兮掛銀冰於十圍擎滉漚於巉峭兮忘與塵
世而相違倏思邈之虛牝兮啟懽扉之重扉智欲圓而
行方兮吾非斯人而誰歸乃尋天柱深趨翠微藟藟蕪
蕪而失路兮蒼樵徑之斜暉臨雲表之圉囂兮困泣澗
瀨而歔歔尋九老以澶漫兮不火食而長嬰搪廛寔以
永年兮燭石芝而自肥約秋深以獨徃兮共趺跏而忘
機我飢調矣我僕痛矣乃聆八音於陂池兮攄萬松於

數數而如魑骨驚心悸意奪神逃俯仰觀覲去住翫瞧
爾其雞園揀碧鷲館棉霄飛簷啄雉疊摘盤蛟或支蝸
石或就龜橋或依獠穴或枕螭坳憑太清以飛構越埃
埴以騰捎莫不凝魂幽礪委骨荒椒窮年累歲茹草吞
蕭快蒲根之漸老暨松子之方彫啗耆域之榮樹護佛
調之眠彪革囊來天女之試紅笑縱烈火之燒海水可
竭須彌可搖大半秦人而越客間有投冠而棄貂乃度
天門之閶闔兮登光相之削硤撫杪攤而四望兮信蜀

道之登天向沆瀣以縱觀兮識坤靈之磅礴指點巴字
之縈紆遙對大荒之寥廓岨峽晒經巫陽劍閣三江五
溪周廻聯絡衆水夤其蹄涔諸山覲其挖撮或虎變而
龍馴或蹕麟而翥鷺或牯犂偃蹇而蹙躡或駟獐鬚鬣
以號攫或螺贏而鳩鵲或蟻螻而螫蜚或灌叢而茂悅
或宿莽而沃若或恠兮三足六眸或竒兮九頭一角或
連兮淵客榜人之歌淮南風波相隨或斷兮匏瓜牽牛
之處河漢東西相却或覆兮孤臣逐客窮窮讎讒悁悁

之有懷或舒兮酒侶詩傳嘲風弄月暨暨之長嘯壯兮
力士之干戈烈兮忠臣之謬謬高兮千年萬世挺秀於
魯丘鄒軻之間卑兮朝再暮三投足於秦關燕市之末
同兮依形附勢而奔趨異兮樹黨立朋而相割南威青
琴兮煥其美寧成犖麋兮呈其惡狀別形衿糾纏赧駁
本物態之變幻類人事之紛錯亦令人喜亦令人愕乃
拂吟袖於高寒振塵衣於碧落浩浩乎不知所乘兮登
閬風而綈馬翩翩乎隨其所適兮濟神水而駕鶴乃若

連氛累靄揜日韜霞崩雲屑雨或近或賒波湫瀦訥
電揚沙四塞籠煙似公超之有術單衣索纊嘆遷客之
無家及爾長風擁篲盡掃浮陰雲驅萬壑日入千林爾
其白毫挺出恍若玉玦之蟠空踈霧平鋪宛如野馬之
撲面俄而蝮螻亘於厓牙鳥語鳴其佛現豈大士之弄
丸兮以有為為露電或礧質之鬱英兮乘薈輝而流絢
方施鞭而吐火兮成纓就而規練乃若斗杓既仄啟明
尚杳午夜風微寒霜冱宵少焉暝色瞳矐燭光縹緲始

而散出幽窻繼而遙分雲表厓依乍吐若藜杖之生花
過嶂愈明如星珠之泛島一往一來或巨或小熠燿宵
流火泉夜曉將落霞而齊飛值雄飈而更燎好事者謂
之聖燈窮理者莫之探討意者山魃木衆蜃樓海市之
類經之所謂見恠物則祀之者也因勝槩之偶來念此
日之難得水蔕蔕以浩淼山矗矗而巖磔足踟躕而九
迴心惆悵而百折瞻上林而盼望兮驚題柱之奇才對
春樹以遙思兮傷騎鯨之可哀嗟知己之幾何慨遭逢

之不偶每景短而思長或輪平而路陡使桓譚之鑑別
少差兮文章幾於覆瓿彼李定之萋菲既售兮甲兵起
於臂肘以夫子之忠懇兮宜鼎司而台斗何此理之不
然兮竟東擯而西走故是非蓋棺而後定毀譽何世而
不有遠眺長思感今追古孰嫖孰媼孰賓孰主孰懷瑜
兮孰握瑕孰飫甘兮孰攻苦彼鵠螟之較鵬鷃兮固殊
形骸而螻蛄之與螭螭兮同歸塵土是以至人握金鏡
達士坐甕玄脩身兮其損在我銘鑄兮其默在天默我

窮兮則蠖屈默我達兮則鳳騫或可以肆我之志兮羌
賣卜以何嫌如俯仰之無愧兮篋翁亦至今而猶傳苟
棲不擇木翔非日邊投彼琳瑯負此龍淵雖有賢臣之
頌兮亦明月無因而至前故寧陳情而泯泯看霧市以
媽媽繫此夕其何夕兮余何為而山嶮俯仰古今於一
望兮渺天地之何小何芝蕙之不禁何松栢之不革嗟
買銳之長鳴兮歎西昏而東曉方見紫而成綠亦視丹
而為皜信陵谷之盤渦終舜英之難保登九疑兮隔洞

庭望滄海兮迷蓬島既達觀於真宰兮胡脫跡之不早
曷不齊萬物於一致兮委彭殤於壽夭歌在陸以弗告
兮與茲山而並老招浮伯以容與兮巢雲窩於雲表擁
香國之崇蘭兮樹空谷以自好褰薜荔以自娛兮時濯
纓乎幽沼雲無心兮洞門鳥長鳴兮木杪已矣乎吾將
反觀乎太初兮求自得以為寶奚嘯嘯超超乎浮名兮
坐令朱顏白足彫剝紅塵道

聖泉賦

馮惟健

泉在貴竹城西北十里其泉倏盈忽虛莫測其機因
謂之聖觀者異焉馮子為作賦以解其惑其辭曰

執儻子從玄化子飄飄玩世遨遊四極雄覽八埏至乎
祝融少皞之虛憩乎叩笮蒼梧之間傍皇相羊息徒解
裝言往觀乎聖泉於是披雲霞啟蕙路乘清風騁輕御
振衣乎高岡馳情乎太素爾乃遙望其地則東接銅鼓
西眺木菁南迤芳洲北拱翠屏近察其勢則繚以重阜
經以長川覆以華棟甃以石淵承曲池而構閣疏龍首

以揚涓其樹則楮楓楨榲柅檉杞其草則歲韭薪莎
蓀芝蒹蘭阿那被麗被風凝煙黃鳥好音鷓鴣翩翩其
陂池則參差刻鏤塍疇龍鱗農民荷鋤將有事乎春田
唯涓涓之不竭故比澤於玄雲爾乃覽其風氣之所襲
萃景物之所披敷如遊方丈與蓬壺鬱乎西南之奧區
於是相與造於泉上凭石欄而觀之沕兮其流之自滿
也儵兮其源之自返也洞滢瑩澈滂洩滃滃延佇有頃
蓋五六而至焉執微子眇然駭曰異哉豈人為之機械

抑天地之自然何顧盼之須臾邈消長之無端玄化子
莞爾而笑曰子何異茲邪夫大鈞播物陰陽陶蒸萬變
錯說不可殫形世乃有陰火不熟沸潭無冰趯突騰珠
火井飛熒抑孰使之邪吾且語子以天地之大恆終古
之常然變子之疑冰宏子以達觀且渾沌之初寧有天
地暨鴻濛之剖判劃黃承而玄茫伊方員之始凝羗川
湧而嶽峙何浮沉之殊裁而剛柔之異濟時迤邐而稱
今忽渺茫而云古四時分糾以交化欬燥濕而寒暑既

融朗以開曉復黯黯而淪夜何日月之雙懸逋靈曜乎
天寓蚌蛤形於晦朔潮汐應乎旦暮坤北遊而上浮日
北陸而下地觸膚寸以興雲沛虛空以流雨紛雷颶而
電爍亦寂然其何處斯天下之至神羗誰為之使者大
哉消息乎一陰一陽一闔一闢萬有之妙窮之此域吾
方有感於斯泉也無徵於有兮有妙於無無用之極兮
有利之腴天地之化兮周流六虛於穆還轉兮宛單相
扶盍兮瀢兮衆變不居坎兮蹇兮烏識其趨虛兮盈之

宇盈兮虛之廬復姤共軸兮屈伸同區鼓予身之橐籥
順鄴鄂以呼吸既因往以息來亦上下其相須草無秋
而違霜桃李粲其春數物欣欣於所遇時冉冉而遂徂
繫陳迹之可懷煥日新而如初玩尺蠖之為利探野馬
之玄樞推通變以隨時固聖哲之所圖苟非兩以裁化
縱一神之焉如蓋乾坤毀則無以見易易不可見則乾
坤之理或幾乎息矣子徒異泉流之無端而不睹天地
之變態效罔兩之責影而不知操持之有待也不亦惑

乎子諦觀焉爾其出也浸淫淅瀝映呻披離沛轆轤兮
其四施也爾其入也矜劓跖蹢呶噉搞捋洞瀟滂兮其
寂寥也渾渾沌沌放乎無垠杳杳冥冥歸乎至真降以
胎升動以涵靜滿而不溢縮而不窘動兮為乾靜兮為
坤大以乾生廣以坤存易簡理得為易之門其源滴瀝
中涵太極其池方丈渾合萬象莫知其端莫究其狀觀
之者妄競之心平躁侈之欲降坎坷之氣舒跼促之情
暢不窺河洛而圖書之理章不濯滄浪而清濁之有量

此伏羲氏所以玩於環中尼父所為嘆於川上也且夫
天地一水兮太虛一源古今一瞬兮萬有一涓巨細殊
形兮理安有異久暫異時兮安有二致知來藏徃義軒
得之以神德兮翕受敷施堯舜得之而為治出日入月
彭老得之以養生兮流行坎止孔顏得之而處世微鈔
通玄合體自然夫是之謂聖泉執微子蹶爾而興曰達
人之言哉吾於是乎喻道焉曩予有蒙固之疾幸見藥
於吾子乃今脫然愈矣蓋俯仰無僇洋然而退

天馬山賦

朱淵

壺公蒲鎮山也東分一枝屏翰海上列為五侯半落
天表復折而西行隱見起伏且數十里結為文峰端
偉秀拔飛動不居有天馬行空之勢而首足尾鬣色
色完具不可繫維余為之定名天馬山居暇日因為
之賦世有九方臯者索諸牝牡驪黃之外當自得之
何是物之神雋羌捷業而騰凌離埃壒之混濁憑豐隆
而上征遡金天之浩蕩纂玉宇之崢嶸按圖經而索故

吾不知其所以為名而其為物也氣吐青煙目懸皎日
尾掃攢林足蹋磻石以鉤陳為韁維雷霆為鞭策雲霞
為鞍韉江海為槽檻動隨氣機行無轍跡投足而安唯
意所適廼者從天而下既佶且閑騰達乎象外蹤浪乎
人間爛神光之炯炯灑汗血之斑斑朝發崑崙之巔暮
抵祝融之境浮巨浸之渺瀰驀遐陬之修永閃走電之
遺光歛狂飈而先逞孰氣力之可任風造化之所乘行
若蜚蛇進不暴猛越巔徼破閩荒望莆口過遊洋擘八

壺之右派遙五侯於上蒼翳若木映扶桑凌溟海而飛
渡觀初曜之景光爾乃駐金驂停玉步靡然東馳忽焉
西顧行行且止遲遲不去挹穀城之仙風愛沙堤之煙
樹擷錦園之芳蕤濯銀塘之橫素島嶼明沒滄桑朝暮
爾來八萬六千歲於茲矣纏井絡殿坤維仰抹晴昊炎
背冬曦吸寥天之爽氣餐九土之華滋矯矯雲龍之勢
濯濯君子之儀使仰之者起敬而翫之者忘疲至若廣
壑噓煙朔野振吹天地倏起風雨驟至爾乃奮迅踴躍

怒張噴噓喋毛涓興嘶鳴海沸虎豹望之辟易鯨鯢聞
之震悸居人為之迷方行者不敢仰視昔者河圖示兆
候日開祥庖羲作易伊祈開唐運丁熙皞之會位協東
南之陽宜其鍾為人物洩為文章珠璣璀璨金薤琳琅
掉鞅乎詞苑振步乎周行藻繪殷呬黼黻舜裳其靈異
徵應有如此者若夫驂騑紫燕騷裊駉駉來月氏之重
譯產渥洼之淵水圖畫傳觀歌聲載起顧盼光榮服御
華侈豈徒慕夫名高亦有稱於德美然而道非無方日

惟千里而其名係於天者顧若是而已乎若夫雲閑之駿天駟之駒毓於無極產於太初亘萬古而不息行六合而有餘將以殖琬琰載璫璣負金匱之璽發玉檢之書服太乙之葆輅駕上帝之采輿乘風馭氣周流於瀕洞廣莫之野吾又安知其所如也

懷故園賦

并序

顧大典

昔庾信賦小園眷長林而偃息陸機賦懷土撫征轡以躊躇雖寄興不同而抒情則一余也家世東吳園依北

郭迴溪石瀨雖非靈運之新營芳樹清流敢擬僧淵
之精舍曾下帷於綺歲宜養拙於閒居緬自釋褐明
光以至服官郎署薄遊數載衣緇京洛之塵閱歲丹
齡鬢染河陽之色嶺上白雲誰侶山中叢桂堪招帝
里雖榮慈闈日遠况夙抱幽憂之疾久違寥廓之思
觸緒興懷感時增恨式抽短思爰賦茲篇其辭曰
承明時之嘉惠彰玉署之華纓眷白雲而延佇移仕版
於陪京仰舊宮之宏麗倚天闕之崢嶸攬三山之夕秀

慨六代之朝榮陟層臺以騁望悵懷土而靡寧江淼淼其無際雲冉冉其遐征懼匏瓜之徒繫嗟萍梗之飄零愴鍾儀之楚奏悲莊舄之越吟心怵怵而軫憂思縈縈而如醒睇征鴻之遵渚感倦鳥之長鳴永濡迹於京邑因組繆以自嬰况迺歲晏多懷羈人易感密霰凝愁同雲結慘青鬢兮蕭疎白日兮晼晚年荏苒兮飈迹跡悠揚兮蓬轉行彌久而情深途非遥而望遠積思成悽積悽成悲魂何寢而不夢夢何夕而不歸自筮仕而再遷兮屢逐食而

推移展四體而率職兮逾一紀而迄茲詎飾擢之匪榮
嘆微尚之日違撫南枝以予于盼北郭而踟躕戒膏秣
以肅駕願言返乎故墟迺若爰居爰處句吳之里潘岳
面城晏嬰近市環雉堞以縈紆接虹臯而迤邐松落落
兮垂陰石累累兮崎嶇草薿薿兮蒙茸鹿麕麕兮騰倚
抗丹檻兮臨渠列芳園兮雜綺復有清音之閣舒嘯之
臺素琴之室玄覽之齋幽軒窈窕密樾交加枝翻鳥去
沼溢鷗來屋覆王猷之竹几飄何遜之梅館熟潘尼之

果庭森玄盛之槐一壑風煙半頃莓苔笑彼買山聊同
鑿坯若夫旭日始暖和風載揚遊絲罥樹舞燕窺梁傷
紫陌之春度對紅芳而斷腸至如羲輪揚烈祝馭當衡
朱華逞艷碧樹舒榮蜩蟬鳴而晝永熠燿飛而夜清及
其金蠶屆節冰簟生涼玉繩湛色珪月流光雁初飛兮
木欲落露將溥兮夜未央又若急景周年窮陰促節野
慘繁雲庭含積雪愁僵卧於衡門聊擁衾於邃閣悠然
四序眷此一丘從吾所好樂以忘憂覺身聖於宇宙毒

塵慮之紛紜遯世無悶賁園今有睠北山之草堂懷潯
陽之舊友闢蔣詡之三徑植陶潛之五柳蚤脫迹兮簪
纓永屏居兮林藪寧耕負郭之田詎羨步兵之酒於是
謝華綬曳輕裾結霞思振煙衢遠喧囂以成趣繫逍遙
以自娛或擁膝而嘯或垂竿而漁或携筇而眺或負鉤
而鋤或漱流而枕石或種藥而蒔蔬或寄賞於絲竹或
樂志於琴書或奉輕軒以獻壽或席長筵以怡愉歸與
歸與吾將覓萼鱸於江滸藝花竹於郊居非敢忘情於

魏闕聊以保已於斑廬系曰歌藂桂兮山之隈維吾廬
兮江之湄閱山中兮四時結區外兮遐思賦歸來兮秩
滿以為期

遊羅浮山賦

湯顯祖

夫星圖粵地引潮汐於玄紐日次周天啓晝夜於陽
陸然則南嶺之南北戶之北固以輿象之所偏龐燭
龍之所長寤矣而廬嶽天子之障衡山祝融之嶸樞
軸雖連於西極經絡未窮於南紀高融奧博是在羅

浮羅山上直百粵之精旁羅赤溟之氣軒轅以降隆
為粵嶽矣而浮山者是惟蓬萊神山浮自會稽靈海
斷鰲不足比其波蕩操蛇不足異其轉徙蓋流睽絕
橋佇胎分巖飛峰息壤神理自然所悵鬱者名迹蕪
藹采真莫續湧塔暗朝花之影沉湖銷夜樂之音每
與友人和衍曾曾人藉歎恨其奇大有終焉之意而
東官陵祀升踐靡由辛卯冬十月始以出尉徐聞速
令尹崔子玉於南海遲文學翟從先於東莞拙川墟

復原濕宿朱明曜真之館候晴霏焉蓋晦夕也詰朝
朔微雨襲梅墟經白門聽泉於葉大夫春及之廊阿
明日觀大簾泉避雨廟肱弔湛公於黃龍講堂道甚
窄硤夜光青霞洞中有湛公樓七楹仙鼠居之此盡
下界三矣明日起青霞至巔際觀日出為中上六界
美人峰殊好袖如道人時時出雲其下千仞葉大夫
石館處也日始華露欲晞見城廓者四五前立石雙
如蛾翅豎又立石翦為燕子門一名彈子門為美人

障其前蟾蜍峰也同人不前獨往彌勝從數羽衣人
芟蘊而上馬道二十餘里廻翔眩視草樹飛走光氣
有異非所經識意謂靈境阻鬱剗然一岡平曼修婉
名以子午正其昏朝登頓再舍圭陰未禺遂躡飛雲
凌日觀惟見香爐一具白水一卮祀羅浮君焉望天
池以陽星沙而陰東連扶津之藹西盡崦嵫之色靡
不區封有眇眇無倪者矣可謂恢魁乎大觀淵綿
其神致也哉枕石起卧欣言賦之儼於謝靈運想似

浮寫差為飛慳云爾

極廬衡之經首暉赤嶽於賁禺畧招搖之桂樹望雲氣
於蒼梧問津途於莞城釋泛舟於源墟艷林霏之窈窕
漠巖戶之紆徐晨光飛而首路夕影流而載驅倒煙容
於衿帶睇朱明於隙餘磴環賴于莽蒼林纖密以扶疎
策孤征而掩影鳥群歸而沸呼傍靈池以涉趾歷廻梁
而聳軀鍾鼓鳴於林間香氣騰於路隅是為帝軒轅之
所履神赤燁之所廬坐參正而披衣閤柳中而定居何

遷人之鞅掌得借一於冲虛靈想接而心歡營宅清而
寐除慨衣冠其委土想丹竈之流珠問洗藥於真人發靈
簫於聖姑守瑤光之玉虎戴碧斗之銅魚恨天華之宮
不存怨明月之壇久蕪斷冥心其莫引翳神光其忽諸
徒使來粵都者走明珠於合浦浮毳衣於賈胡彼臯壤
與山林非天性其焉如將縱觀其窟宅恣風雲之襲余
度石關之穹窿接新構之離婁泉淙淙而夜鳴雲英英
而晝敷清不可以久畱澹容與以踟躕山帶氲而翠積

水簾波而素紆營磐砥兮偃仰蹠葩華兮噴噓避雨蜩
蝶之洞睨梁天漢之虛拂金沙兮夜語蹶青霞兮旦發
逗威夷而宛轉望敦龐而塊軋澹孤青於氣表漏陽華
於空閣砉崖隙於川渠錯琤瓏於樓閣雖道絕於登降
亦臨觀其曲折緬增城其在茲逋仙風而坂嶸俯龍門
而直上有流光之影撒激上界之精華照下方之明滅
何峰容之偉竒漾真人之秀烈偶儼石之前臨露參差
而障列如倚翅以斯冲似懸帆之次揭映神姬之出雲

美朝暾而暮晰轉靈蝸而下視象寒津之漱齧始神山
其浮來自會稽而涌垤覽至今其草木有東方之種別
泯合際於羅丘度鐵橋而綴缺豈華靈之遠擘非秦皇
之近設抵半舍而泉分宿煙炊而飯潔頓金策之拳奇
步羽人之勃窣上登嶺其若梯進孱顏其若闌峭壁虛
而溜浮積泐欹而苔滑寄掌股於旁陘托跟趾乎冒櫪
葢起瑤池而躡飛雲周三十里之靈樾象耕之所絕蹊
雉樵之所迷術肆奇樹之葱龍并異卉兮冥密紺蒼

凝而互陰碧鮮流而競發固風霞之所藹藹亦丹膏之所淫鬱有一花而四照有五色而一節或建日而無影或嵌空而有雪青珠冷風其欲亂珊瑚叢生而逾活神麋倚其雍容仙輶影而撇拂木客離筵而似語山魃隱映而倏忽別有朝菌若雲夜芝如月翠羽攢菁金粉浮馥曩得一而為艷此成林而不掇固靈境其常然歎人生之靚絕謂林封而徑窮忽罔巒之秀濶擬撐距而不前乃按衍而條達曉發足於青霞午凌岡而戴茱候鷄

鳴於上霄降茲鸞而子未正子午之嘉名定昏曉之相
割念人間之急晷劣放車而已瞥矧山行之阻迂慮峰
攢而影咽竟凌霄而未禺何鄧林之蚤渴豈日氣之偏
延非海音之所遏遂徑度其造天極空窠而戴日屬相
窺於壘碓辨交廡之隴埒眇蒨木於河林認扶桑於渤
碣揆瓊州而地矯引長星而天豁布盼蠻之芒芒衆每
生而忽忽偶旦宅以推排糝山川與名物昔冥立而去
燕今南池而徙越為情多其苦悲亦心淺而易悅塵影

含而志虧年路深而意沒夜樂何時而遇仙花首何因
而禮佛忖凡情於聖真若闕觀與窮髮將無始之趣未
融令有終之相難閱朱鳳沫而潭氛碧雞殷而石裂覽
異鳥其參差意靈禽之彷彿宮觀歸而如在丘壑虛而
豈屈吾將洗浮氲於自然悟空明於一切朱陵之闕靡
闕曜真之氣長結耀光景兮負不知乎天之所窮靚凌
兢兮吾以觀乎日之所出

明文海卷十七

欽定四庫全書

明文海卷十八

餘姚黃宗義編

賦十八

山川十

煮惠泉賦

徐獻忠

叔毗遠遊來歸汲惠山泉一罌遺予東臯之上
予方靜掩竹門消詳鶴夢奇事忽來逸思橫發
乃乞新火煮而品之因述其槩授童子歸謝叔毗

馬

乃何子之特發探水穴於山椒挂清寒於齒牙記老
羽於惠寮甘平雲之乳竇因起興於瓢操望徐子以
馳神出簡書於下曹侑以陽羨之珍穀雨之苗走奇
芬於鼻觀參春靈之上苞合二美於一旦嘉朋好之
我遭如上客兮在門赴靈脩之久要發空濛之玄閤
辟塵網之喧囂爾則陶氏之鼎改餘之火既精滌盪
遂集文武瀉玉液兮懸崖分小瀑兮如布忽變紺寒

蒸氣如霧覺蟹眼之旋生復中起兮如破涌江潮於
羅剎沸晶潏於洛浦於是歸功茗事頌德玄冥出太
素於碧落浮瑤光於紫清露華紛其秋澹佳氣鬱乎
春明媚幽懷之無始眷高況兮凌雲游玄神兮顧渚
仍舊事兮南陵興咄咄兮七發心冉冉兮獨醒來山
谷兮雙井扣太上兮黃庭奔走羣公逍遙竹門品上
池之獨重解煩思而宵征信馳心於冥漠無乃下甘露
而清洪河也

武夷山賦

瞿汝稷

昔興公寄想於赤城第形毫素青蓮懷異於天姥徒勤
夢思二賢或剖竹永嘉或栖蹤姑熟欲振策兩山但取
杭一葦而煙霞僅通於枕席泉石未接其嘯歌以是語
遊遊未易哉萬厯庚子暮春予自昭武解組塗經武夷
夷猶九曲躋覽羣峰幸埃壘之既遠嘉魚鳥之自親一
詠一觴再信再宿聊為短賦以志勝遊事緝繡其疇回
兮願遠遊以自疏聞控鶴之休德兮拊余馴而遙驅越

嶰壑之嶮岬兮凌連岡之崎嶇
溯寒流之澹淡兮覺囂囂
紛之盡祛嘉澄波之活活兮
炯鑑瑩而練紆寄湍急而
潔清兮復奚遑而可渝揚舲
津口引領頓異聯嶺周繚
而阨巖兮墮玉城於冰滙天
柱嵯峨而突起兮若竦麗
譙於天之際杳窈丹臺寵
窈靈氣冰桃華敷兮萬齡碧
藕芬含兮千禩鰲負闕兮
環以羅芝成宮兮芳且遽鼓
蘭枻以縱尋汎泠谿之森沉
千峰拔猗瀾以翔霄萬彩
落雲霞而印潯靡奇弗寫於
文漣靡影弗會於幽襟迎

覽競爽隨姿易陰嫵無駢態秀各異臨行彌進而眺彌
新境愈移而賞愈深如是循溪之曲凡九彈一曲而佳
麗不可勝紀矣每曲盡則軌芴若塗盡轉櫟而婉蟬復
前啟歷九轉而九啟殆萬變而萬美無尺壤而不改觀
無片石而不壞詭愷之貽睨而莫能圖文考腐毫而莫能
擬蒼麓廻環丹崖中闢搖筍左摧綺屏右翼蘅蓀晝夢
竹檜攢碧禽流好音磴謝塵蹟是藏紫陽之精廬實莫
茲山之正中亦首茲山之幽寂焉超氛埃而曾舉兮夫

子既勁其雲翮豈陞皇之有竦兮悲沉濁之方塞返狄
成於章夏兮功寧後於禹稷懸素瀑於青靄挺仙掌之
茗茗拾複坂稅重椒臻天游之仙館追逸駕於虹橋窮
八閩於目睫收九曲於堂坳霏彩下羅隱伏畢昭向之
雞睨魚瞰而猝不能悉者於是還矚流覽不能遯其秋
毫焉鼓子嶮嶮莫之與齊齊雲孤騫峭拂幹維珠庭璇
宇馮烟抱霓开巖腹以虛構若鷓鴣之巢於層栢仙舫
橫空千秋不移仙杼織月如聞理絲昇真玉華屢屢莫

堦垂銀鐙於絕壁倚遊鷗而仰躋豈都盧所能逞惟玄
族所長棲壹予志而斯登恍逍遙於太儀撫翠鬣於龍
穴料峯膏於鑑池采若木之初藹折白榆之脩枝精皎
皎以往來何彼蛻之云稽昨真寄於列函挾金華於潛
基豈假鑄於首山昉馳軼於天達唐曜飛沫勝益卓絕
兩崕百轉一徑中豁凝黛環舞淙流紛憂入蘿洞以旁
折煙光蔚兮望別紫翠四合而嶮嵯飛泉空垂以飄瞥
英英煥披晶晶瑩徹洒晴雪於岑阿散天花於芳越夜

光簾箔兮先日燦雲母果愚兮侵漢列至於九曲既逾
溝塍膴膴藹藹桑榆芾芾禾黍居盡抱甕之丈人行皆
牽犢之巢父赫胥匪遙尊盧接武苟玄都之可托又奚
謂非吾土稽神樞於雲笈錫玄化之嘉名幸浮游於斯
域得信宿乎福庭於谷神而知根何慢亭兮靡徵雲祠
爛兮紛可接居巢婉兮鳴何清昔康樂之遷閩兮日念
歸而怔營之問之望越臺兮綴北思而靡寧中繆綴於
外物對青輝而弗察雖雅尚於山川顧當美而搖奪彼

夢鳥之厲天亦奚矜夫騰越儵為魚而沒淵又何悵於
天關知天淵之靡貳兮將安錯其欣怛彼丘山之善於
人實神者之不勝矧涉山猶未善雖予騫輓之將焉正
山蒼蒼兮木蚺蚺水湜湜兮環山以流合氣於漠兮懔
何求掌移九曲兮吾奚行而不與之夷猶

聽泉賦

贈歙邑洪希仁

顧彥夫

繫茲人之洵美兮紛世俗以鞿羈哀往轍之莫吾追兮
寤警枕以增欷沐蘭湯之浮浮兮束蕙穠之楚楚振芟

衣之芳綠兮蹠芝麓之幽阻石凝碧以硃礪兮雲垂白
而龍葱憑脩篁以少憩兮忽機慮之消融耳山竇之流
泉兮儼鏘金以鳴玉風吹之而若斷兮勢迫之而遽續
豈水石之交激兮或高下之相形抑天機之自爾雖遏
之而亦鳴彼簫韶之九成兮致鳳凰之來儀非后夔之
使然兮奚盡善之可為嗟爾泉之清兮隨古今而有聲
罔假六律以損益兮亦若五音之鏗訇羌箏琶之里耳
獲清音而一洗溘曜靈之西墜兮欲歸與而載止乃援

琴而歌之曰泉非琴兮聲與琴同琴非泉兮韻與泉通
予覺其妙兮口不能形容維泉涓涓兮維山崔崔嗟知
音之人邈兮其誰知之

春山曉烟賦 何偉然

春山冶媚敷蕤吐鮮迺醒曙色溟蒙罩烟隱曉妝而蘊
黛籠翠微而連蜷維烟雲之逸性原與山而為便乍娟
鬟之亂風復仙繭之抽月乍文縠之霧捲復冰綃之市
揭忽忽悠悠非粘非曳若山靈春睡未覺而素幃尚垂

野鶴夜唳而羽衣猶刷草木無香入薰野燎不焚爛發
寒江之水面飛至神丘之火穴分來迷花抱石春艷朝
顏屯巒眉岫嶮巖欲埋類愁人之眉鎖顏鬱結而未開
山圖巖畫李夫人簾內朦朧幻魄游魂楚襄王夢中仿
彿何綿茫盤礴之難狀而迴散縈積之無恒也豈中有
異人焉如介子者天啟其逸欲燠之而出谷有異珍焉如
和璞者天愛其寶故暗之而靈采有清臞之骨焉翳被
之而留其瘦影有幽潛之姿焉沈冥之而養其龍德不

則憐山屐之方縣未許青鞵踏破侈春工之淫佚不嫌
粉翠太盈問蛺蝶之奚從莫披根而躡影嘆謫起而橫
出予適悲夫人情既見世態之如曉烟誠藏山之惟恐
不深

星石賦

黃卿

履古壙之沙隈有孤石之歆頽形落落其怪漏質泐解
如將隳巨不堪於礎城小弗取於砌礎以磨礪則踈欲
踞立則危石工過而不睨蹇永謝於鑿鉋余眴若嘆嗟

之曰茲非氣之核乎非土之精乎何異乎磴磴磊磊之
确亦與齟齬研研者殊豈初平羣羊之變或經秦皇之
鞭驅有一頌白笑揖前曰子儉於博物哉是隕星之棄
耳萬物之中石最粗重然變化幻怪尚幽矣夥矣嗟耿
耿之懸曜聿萬物之騰光固積石之有耀亦神物之靡
常或飛超而急隱茲朽墜之永僵惟氣類之從土而石
乃土之至剛羗理氣之必有抑何惑於渺茫余釐然復
之曰星隕之石傳之邈矣今果徵罔誕也夫古稱良之

羲和甘石追常秩之靈臺保章夜候躔度之流宇守射
風以獻夫占兆機祥其動雖微不迂其事則隱而章麟
經之書如雨書隕五則聖人之於變也致慎而且詳顧
茲數尺之頑礪諒亦關於推步不知歲代之遠邇飽風
霜與雪露惜群志之失書致傳播之屢誤苔蘚翳以如
衣泥滓紛其凝洄我載拂拭正我襟履重其來之高遠
也彼其頑泐吾何惡

明文海卷十八

欽定四庫全書

集部

明文海卷二十九至三十三

詳校官編修

臣錢樾

主事銜

臣徐以坤覆勘

總校官

庶吉士臣倉聖脉

校對官

中書臣石鴻緒

謄錄監生

臣姚希慶

謄錄監生

臣包文訓

欽定四庫全書

明文海卷十九

餘姚黃宗義編

賦十九

弔古一

弔賈生賦

朱伯賢

恭承間氣兮大賢天縱明王不作兮急棄三統文章經
國兮痛哭規諷獨倡寡和兮不能從衆材大無偶兮世
莫為用嗚呼夫子兮何獨使子之悲慟世溷濁而不分

兮螭龍蠃蚌御濮便娟兮九韶博衍鸞鳳高逝兮鷦雀
堂壇羣愚滿廷兮賢良日遠大儒逆斥兮嗇夫俊善謂
變無能兮微螭婉婉卞薛無知兮懷由自銜於乎夫子
兮竟罹此變烏虜哀哉行或泥沮兮何為亡故用而毀
兮天馬振迅渥洼之渚兮鯢鵬搏搖瀚海風雨兮驪龍
遺珠照耀天下兮神龜負文九疇攸叙兮嗟若夫子
三代該輔兮摯旦上天世莫與伍兮於戲哀哉杞梓連
抱兮執斧袖手良璞萬鎰兮玉人卻走騏驎逸羣兮轡

御徒後巨舟棄風兮楫者坐受命世大材兮履昌是就
夏殷忽沒兮時非吾有吁嗟蹭蹬兮孰為此醜有大志
而不伸兮千載誰偶諱曰已矣世其莫吾知兮子獨鬱
悵其誰尤時之不吾遇兮志之不盡施用行舍藏兮嗟
憂泣其欲奚為獨不見夫黃鵠之高舉兮遭矰繳而羅
之麒麟之不羈兮鉏耨獲以縻之謂仁者之必信兮世
無伯夷賢正之必容兮孔孟以治傳說列星兮嚴禁胥
靡寧戚疾歌兮牛下單衣呂望之鼓刀兮非熊非羆將

老死於渭蟠兮殷民曷懷箕子之忠諫兮終于囚累洪
範之不陳兮吾將曷歸嗚呼噫戲物故各有遇兮遇故
各有時服吾道之在人兮俟天定而勿違出則棄咎兮
入而莘野之夫楚萊之廬達固大行兮窮獨離居樂天
知命兮顏氏庶幾吁嗟夫子兮曷獨為爾之憂悲彼尋
常之詭遇兮孰為之範我馳驅也循狗名而未遑兮夫
何抑示之遠思也生民之不幸兮堯舜遠而遂使夫子
兮汨沒逢災匪皇天之愍遺兮實人事之弗基若夫人

之有知吾將指三代以為期

弔賈太傅賦

桑悅

從長江之莽莽兮中有江曰汨羅惟靈均之往湛兮衍
千古之清波何先生之清風兮正靈均首丘之所都投
雄辭而嘅弔兮若救種而烹蟲珮帶遺乎蘭蕙兮衣裳
留乎芙蓉儼騷經之滿目兮邀子辭以相歔赫炎漢之
芳隆兮親溺楚于一螺穩璣衡以平運兮齊日月乎義
和飛修壟而內薄兮爭排挾乎嵩嶠駟魑魍而比健兮

豈息脈之微瘥本根豐而孰孰兮亦盤翳乎條柯鬱蚩
尤之柱天兮入剪伐而么魔倒冠履之上下兮視蟻蛭
為嵯峨僉譚譚以笑語兮獨予淚之滂沱催黃潤以成
匠兮豈歛止乎龍梭舍珪璋于巨璞兮隨岡阜之陂陀
左控搏乎南威兮右撫抹兮妖娥憐陵革之奇質兮弄
光景而逶迤收馳驟而守閭兮夢天山以秣禾憑旱雲
以輸棕兮惜來日之無多悲崦嵫之易暮兮慨致鵬之
非囹圄國之汶汶兮鑄寶鑑而為模羗空言之際遇兮

皎夜壑之鸞坡曰予又倅茲土兮後千載而殺那遭聖
明而獨詘兮胡今古之同科謫人生之旁達兮直寒暑
之經過委吾身於造化兮任刀秣而香塗紛紛世之變
幻兮消長袖之傿傿予將釀沈以霑醉味淪陰以成鋪
升都嶠以長嘯兮陟委羽而高歌至息憤而默默兮欲
反觀乎太初終吾生以泮渙兮補先生之婆娑

閒田賦

王翰

條山之陽黃河之傍灌莽極目獸駭鳥翔畎澮縱橫以

遠際溝塗陂陲以衍長經界宛其未改廬井已不可得而詳問平高之耆老乃知古虞君之故邦及芮伯爭而未決賢成於文王者也嗚呼姬周之造跡自后稷之建邦公劉之啟土古公著撫民之庸王季號勤王之祖至翼翼之文王得奔奏禦侮之賢輔三天下而有二猶臣勝商受而遵王之所也傷漢儒之鄙陋議圖讖以厚誣以虞芮賢成而被化為周始稱王而受符以區區之陋邦覩至德於須臾來四十國之臣妾如父召而子俞文

王之受命固定於虞芮之質成若尊號改元斯盛德之所必無也嗚呼天有昭昭之明無諄諄之教視其命之去就在人心之好惡苟處時而得中何必丹書朱雀而為符告也眺荒原之茫茫撫往事而增悼追淳風之不及傷衰世之末造誦綿詩而永嘆為執筆以三叫

土木賦

王世貞

歲在執徐哉四月生魄臣某服驂牡越燕關而北上谷之墟陲靡境埆若陵若伏者焉土則或赭而堊澤翁童

造物鮮功埃昧鬱而要風陰鏃飽血敗削咀精憤乎挾
鬼車以噉鳴狂茅喪棲獬獬辟宮夔魘夷猶叩之莫磨
有一丈人跼踖前曰此所謂土木者也我前人之狗皇
輿代逝靡微大夫金匱之逸臣庶一二寓目焉為蒙熟
之臣曰唯唯昔在故元主有中夏為痼為瘵易耕而獵
儵儵嘒嘒詩書喑嘶禮樂眊眊高帝因天之厭亂提三
尺犄元鹿於西隲之外投諸大荒毋令睚眦挽七澤揚
九派靖風塵而如埽飲湛恩之汪濊文皇勃興介彘騎

濫雷轅阿台土干之流莽伏魔奔者或收椎而內臣或
懷衽而外藩陽陰山南北斗鑿條支以界天門時則有
若魏鄂曹衛宋潁涼英萬衆一羽揮無留衡甌脫樓煩
駝搖神鉦竝乎金湯厯再紀而恟恟如草覲髮螟賢滋
萌蚩尤乃迫上帝下機槍猶狂獬獬之妖鍾為布哈其
豪額森煥蠡遊魂耆金吮鉞曾不足以當漢之一連時
則有若左璫垂貂帷房之幹以為斯徒包藏禍心蠱我
六驅狼山之旁七萃森如虎豹之衛執誣就屠列缺

噤火以伏陰義和束鞭而淪虞輔勇佐禁鶴益之徒楚
材晉良其麗不億膏陂衍而施朝霜海立山卧羨漫荒
搶然而天容穆然神武不崩單于除掃闕氏却行左賢
且渠大小奉觴巴延冥契乎項伯臣善昌泰乎候生曾
未閱歲乘輿蹌蹌雖七曜暫騫而兩儀就康今天子惟
先德慨武功追周文之過密陋漢武之稱襄下書御史
千夫長百夫長材官挽彊續駢拉客踊距騰驤死藝辱
國謀夫孔臧抑虎賁而右鷹揚於是少府發將作詘寺

人絕宮虞衡弛法減膳削御史士衣食蜀蘇析而縷膺
楚金銷以漆輅狹馳三千長轂九百期門飲飛飽勇怒
而不得發搏人以軾投石而樂天狐掌射豐隆脂軌博
望鄉導水行亡乏乃鹵溫禺臬郅支回刃南面者寸劉
銖獮斬賴輶以夕薪炮馱馱而佐朝糜載嫖姚之金人
仆竇氏之故碑天子曰止毋究兵毋招不軌襲爾冑索
爾矢吏士十歲復無事事赦海內與更始坐明堂柔羣
裔雕題矚目日月出沒靡不梯航而勞象胥於是大置

酒合樂而饗之歌曰雪怛信威翼文德父不哭子鮮鰥
室百千萬年戰鬪息告成祖禰樂無極老人起拜曰子
之言美矣郁郁哉請毋死而殳諸土木

哀曹娥賦

有序 李濂

曹娥江在紹興府城西五十餘里有曹娥廟在江之
游李子赴官四明渡是江艤舟謁廟乃作賦哀之時
正德辛巳歲也

我舟南下兮待罪四明道經娥江兮維纜廟傍肅我哀

冠兮跪奠椒漿搗管屬賦兮敬弔娥英越中山水兮靈
淑攸聚上虞之墟兮產茲孝女五月五日兮父溺於斯
逆濤而上兮不得其屍娥年十四兮柔婉令儀哀吟澤
畔兮聞者歔歔旬有七日兮哭聲弗哀沈淵尋父兮與
家人辭皇天監娥心后土憐娥悲載經五日抱父江湄
父子聚首兮厥事神奇川靈擁導兮若負而隨烈魂千
禩兮如或見之瞻拜廟貌兮靈風颯旗毛髮竦豎兮心
口嗟咨諱曰人孰無死兮古今一軌娥名永垂兮死猶

不死穹碑漢篆兮麗牲庭祀度尚雅志兮邯鄲文美絕
妙好辭兮悟三十里摩挲諷誦兮嘉歎不已我賦孔哀
兮投之江沚援翰寫情兮聊以代誄江雲漢兮江波瀾
瀾西日發權兮極目煙水

剡谿賦

有序

李濂

余嘗聞越中山水之佳者剡為最思往遊焉而未能
也屬者壬午之秋偶以公事至剡放舟遊矚殊慰平
生緬懷昔人棹雪之訪厥事已竒然又不見其人而

返則益奇矣倚櫂賦之亦以識吾興耳

放官舸以南騫尋古蹟於嵯州出嶂蒲之浩渺泛剡川
之清幽水潺潺而畢匯山矗矗而四周嗟千巖之競秀
復萬壑之爭流粵山水之絕佳惟會稽之為冠豈竹箭
之能當發人文之炳煥昔山陰之子猷值夜雪之初霽
詠招隱之高篇友太沖而相契聿獨酌以暢心慨古今
而睥睨對朗月以懷人遡寒飈而鼓枻乃經宿而造門
遽轉舟而回挽曰乘興而偶來忽興盡而可返任天真

以遨遊隨己意之舒卷何必見乎其人始盡予之繾綣
留雋語之千年信迹竒而意遠苟神識之潛孚斯骸形
之可護仰賢達之孤標恨吾生之太晚比挂席而入越
浩逸思之翩翩訊安道之故居歷艇湖之澄淵望金庭
與天姥合百里之雲烟岫青青而不斷花冥冥而欲然
人已逝而風存話猶傳而味玄爰夷猶以成賦羌薄暮
而言旋

明文海卷十九

欽定四庫全書

明文海卷二十

餘姚黃宗義編

賦二十

弔古二

首陽山賦

有序 李濂

首陽山在蒲州南四十五里即雷首山也禹貢曰壺口雷首至於太華昔伯夷叔齊隱居茲山李子按部河東過首陽謁二子墓憫其祠宇頽廢乃下令葺焉

夫二子篤萬世君臣之大義孔子褒之徘徊祠墓緬懷懿德於是作首陽山賦

黃鉞兮白旄諫不聽兮子逃予逃兮何之望首陽兮棲遲山有林莽兮乃遯而匿山有薇蕨兮乃饑而食神農虞夏兮邈弗可追聊隨鹿豕兮朝夕娛嬉孰抱祭器兮西歸於周孰陳洪範兮載衍其疇予寧溘死兮弗忍事仇綱絕柱壞兮孰知予憂周粒不可餐商命不可延子將曷歸兮雷首之巔夜汲沆瀣兮晝玩雲烟吁嗟二子

兮求仁得仁舉世非之兮爾獨真自有兩儀兮即有君
臣天冠地履兮上下攸分文王泰伯兮沒齒事殷同稱
至德兮何意孟津不降其志兮不辱其身許由伯成兮
異代同神子臧季札兮挹厥光塵大道之準兮夷齊二
人辭曰叩馬遮說兮丹心瀝血君臣大義兮爾扶其桎
且與適望兮一時之傑目覩危行兮故緘厥舌順天應
人兮固權之絜堅守臣節兮實士之潔謂韶盡善兮武
僅盡美仲尼垂訓兮意亦如此民到於今兮歌頌二子

首陽之殍兮死猶不死廉貪立懦兮聞者興起維聖之清兮萬世仰止

弔長平賦

有序

李濂

長平之坑武安君之無道極矣嘉靖癸未秋余西巡澤潞道經斯地山川如舊風景愴怳停車四顧怛然傷之於是毀豎子之廟撰文以示父老然猶有餘慨焉復造斯賦以洩千古之悲

星軺西邁兮上黨古城山路崎嶇兮夕抵長平賦曰夫

何積骨之成丘兮厥山名曰頭顱詢丹河之既堙兮猶
壤赤而塊蘇宵鬼磷燼明沒兮天陰雨而嘯呼惻趙卒
之四十萬兮乃一鼓而盡屠翳衆命如彼夥兮胡無一
之少延張虛拳猶可奮兮矧執銳而被堅彼豈知坑降
之禍大於劇戰兮後難以重得志於邯鄲詫趙成之惡
夢兮衣偏裂而墜飛龍見金玉之山積兮筮史告王以
閔凶越三日馮亭之使者至兮獻城市邑十七聖人甚
禍無故之利兮棄忠言而罔恤韓嫁災於汝國兮引虎

豺以入室信反間以易括兮竟喪師而失律遺小者二
百四十人兮咸奔歸而竄逸嗤銳頭之豎子兮性殘忍
而嗜戕視人命如雀鼠兮入虞羅而無一生惟王者之
師如時雨兮迎簞食與壺漿何荼毒以騁暴兮忍挾詐
而坑降合哭聲以震野兮仄兩儀而闇三光嗟天道之
好還兮網恢恢而靡漏孰蹈仁而無慶兮孰逆天而有
後豈善戰者不必善亡兮死杜郵其何咎對使者而自
訟兮見爾心之微明付勛名於一劍兮曷足以償百萬

之生靈積不善必有余殃兮遺詬罵於寰宇余過茲地
毀廟兮爰斧像而燔俎趙既亡而秦亦滅兮亦何貴乎
黷武用兵者宜戒其覆轍兮獨不觀諸鄧禹為將久弗
妄殺一人兮不貪功而功聚綿福祚於無窮兮衍子孫
之蕃庶彼豎子之不仁兮勦厥命其自取弔亡卒而成
賦兮慰游魂於終古

弔古賦

有序 葉良佩

嘗讀江文通恨賦而莫喻其意夫文通之恨慙矣奚

以賦為乃予讀之則感感然若有創於其心者於是
遂祖襲其製作弔古賦云

登高丘以騁望兮濬萬里之長空山奔湧若競赴兮雲
裊裊兮相從播衆流而羅絡之兮眇草樹之迴縈曼流
觀乎原堊之古蹟兮歷選幽憤而弔之泉垌何楚均之
蹇蹇兮遭世眊濁而弗庸騏驎困以伏櫪兮騰跋蹇使
橫空放孟娜之佳冶兮娛母姣而從容吾蹈彭咸之抗
迹兮將及中生而締盟蠲爾誠以進胙兮被鳩君之雋

名死且虞國之多難兮夫何命促而志貞去華館之皦
皦兮襲夜臺之冥冥諒舍死誠獨難兮詒嫚子以典刑
白日出之悠悠兮睹厥扶蘇之負寃監蒙將以築邊兮
值孽弟而遘患寢絲綸之夕詔馳鴆毒於晨烟外攘禦
之多績內循省而靡訾作忠奚以見殺玄霧鬱其漫天
覽增成於陽朔錄女德於班姬傷淑閭之賢處驅鸞鳳
而翔鵠矰弋機而在上兮聽和鳴之昌詞軫芳衷之不
怒兮美清潔之可儀久矣友道之淪喪吾獨有感於魏

齊當秦怒之方張暢平原其見繫輸哀悃於虞君損重
位以赴急高信陵之慕義輕千里而負笈何託命於斯
須乃佯襲而罔答相投兔之見於毀爾嗟其何及吁嗟
世之多故兮屯余衆以礪礪望介子於縣山兮窺伍胥
兮江澍息侯要余以陳詞兮萇叔含成而未吐岳魂偃
蹇於杭湖襴魄摧殘於鷺鷥東見田橫於海島兮北悼
明妃於遠浦循西戎閔厥非子兮南尋項籍於垓下已
矣哉人生斯世兮視彼過隙之白駒胡五常之好合紛

萬變其難推猗揚園之君子綜百代之民彛抒幽懷而
作賦聊以配乎侔詩

蓮池賦

王嘉言

夔城之北途路歌傾窮谷幽壑重岡大陵突然呀然攢
巖巖坳偃仰樊援斗折蛇行鮑庄之側有池潏潏冬盡
寒消春歸水增爰有新荷應候發生延及夏月漸以敷
榮員葉鮮萼映彼長莖爛熳而紅交加而青娟娟靚好
冉冉苾馨微風一吹散入芝林乃考載籍以詢民萌曰

歲綿邈矣鑒於熙寧周子判愛是用陶情嗟名儒之遺
跡可想像乎典刑陋武子之嘉樹擬召伯之棠陰嗚呼
武侯八陣之圖洪濤滉漾而石不轉濂溪半畝之池大
旱焦鑠而水常泓豈非二賢之意注神會故越千百祀
而不沒其精靈今之人竊周子之愛以種茲花者何限
而非其自得之學非其灑落之襟則亦羊質而虎皮也
識者寧不笑其效美人之捧心

謁箕子廟賦

使朝
鮮作

祁順

有商之衰兮大道沈淪女戎煽處兮積粟成塵荒亡敗
度兮虐焰肆氛藐天威之不戒兮遠忠言而罔聞嗟哉
夫子兮遭時孔疚義為大臣兮親則諸父視祖烈其至
重兮敢忍然而安處翳象箸之始造兮憂未流之莫支
進樂石於俞綏兮與沈疢之可翳羌狡童其弗悟兮嗜
董羹而如飴耿余衷之激切兮獨遑遑乎何之顧微子
之已去兮余安忍復背其君也嘆比干之既死兮余安
可徒墮其身也甘隱忍以晦遯兮乃佯狂而為奴傷宗

社之覆墜兮抱鳴琴而嘆吁夷羊滿野兮麥秀故都非
夫子之不力兮良天運之已徂維朝鮮僻在東土兮實
夫子之封國祠宇久而彌新兮儼清風之如昨服八條
之教令兮安蠶織而耕鑿信德順以流光兮足廉頑而
敦薄吾生數千載下兮偶奉使而謁茲想儀型以起敬
兮懷不盡之遐思書有九疇兮易有明夷仲尼有贊兮
宗元有碑斯夫子之道大兮又奚用贅乎一辭

反反騷

有序

樊鵬

昔屈原仕楚以讒見棄憂君不已乃作離騷投江而
死以明忠漢揚雄以為君子不得志則蛇龍何必沈
身哉故撫離騷文而反之名曰反騷余讀其文重為
泣然流涕也悲夫屈子負屈千載莫信而雄屈身莽
下不能如龔鮑超然遠舉反譏原之沈身實欲藉彼
非明此是也故曰遜于不虞以保天命其旨意見已
哀哉余故復撫反騷文而反之名曰反反騷蓋非徒
騁辭飾說於一時實欲信鈎環直軌轅於異代也其

詞曰

惟有羊之建拓兮祖高陽而正系派季連之蟬嫣兮流
靈脩嗣世慨靈均降叔運兮隨王車以後先營營蠅蟲
止荊兮君反疑忠而信讒彼既窘步於險隘兮被災殃
而不無言傷靈脩之不吾與兮賦騷詞而沈江潭漢揚
眊雄命原為累余
故命雄為眊投文相弔兮辭反騷而病屈余既懷
茲靡夷兮越千載而直屈彼造化發育蠢靈兮固將妍
醜之靡同賢哲生此人國兮奚必與濁世而皆通麒麟

鳳凰飛步兮豈不擇世而量世苟非其時兮豈不高飛
而遠去眊既知天軌不辟兮嘆純潔而離紛躬自蹈其
渙忍兮空暗纍之繽紛纍帶矩而佩衡兮固君子之高
致豈曰履欒槍以為基兮豈肆文而難質眊閉室而養
志兮既紉秋蘭而扈江離飭嫵娃之腰褭兮顧鬻諸棘
林而墮諸蒺藜鳳凰鳴於金竈兮騏驎試步於鹽車知
枳棘纂纂兮猿狖且不敢下莽奪漢輿自載兮乃羨驥
而驅驢矜芰荷之綠衣兮被芙蓉之朱裳卧汙池而韻

仰伸兮蒙穢濁其可傷纍纍容自綽約兮固未嘗競諸
閨中衆惡貌而量峨眉兮難免乎嫉妬於深宮既不如
羣類之要媚兮亦難毀刑而冽貌若眊之屈身說類兮
亦楚纍之所笑謂神龍宜潛深淵兮纍非眊無葭莩之
親謂鸞鳳宜棲蓬階兮纍非眊無鴻毛之真既疑彼不
高飛兮胡自羣於燕爵恥靈芝不處谷兮以浮萍而為
托夫颺煜煜芳苓兮方當季秋之辰嚴霜落而知明哲
之保身結中情之激烈兮憂王國之無人達清香而揚

素美兮欲靈脩其吾許宣忠芳曜義艷兮庶靈脩而迪
啟非不欲精瓊靡與秋菊兮將以延夫天年非不憂老
冉冉其將至兮憂日薄於西山非不惡落華喪英兮或
傷生而伐性非不欲全脩養正兮常樂天而知命卷薜
芷與若惠兮豈願投於湘淵混申椒與菌桂兮豈願已
於江干將以身而明國兮以死而明生將以命而知天
兮以心而暴誠重華豈為不與兮傳說豈為不儔豈不
與處妃乘雲兮不與瑤臺逸女同舟情婉戀於宗邦安

得望崑崙以樛流腸牽據於祖社安得去彼乎高丘魂
飄飄凌青霄兮八龍馬不可駕遊唐庭揖虞堂兮九招
九歌夫奚呀夫賢聖之不遭兮非親舊固不可如纍之
沈溺既云道不吾以兮固不可流通而弗息知仲尼在
魯遲遲兮不知在齊之接淅知眊之全身保終兮不知
龔鮑之芳譽既譏纍之沉身兮又譏纍不返乎故鄉豈
如眊之乾沒兮乃逐流波之湯湯臣強敵而忘仇讐兮
又何從而美新何惶惑而投閣兮又奚笑纍之沈身纍

固棄由眇之珍兮吾恐眊貽許巢之憂
累固蹠彭咸之所遺兮吾恐眊亦為彭咸之所羞

弔田橫義士賦

黃卿

昭人生之勸劇兮瞻蟾兔之往來
羌行野而遡古今覽齊都之圯頽
昔全勝之嶸嶸兮丘壘壘其茅萊
憶蒿薤之肇音兮季世田橫之可哀
殞旅途以藁葬兮閑悠悠之首丘
之懷兄弟乘時以復國兮繫神明之世胄
何時命之不辰兮瞻蒼蒼之罔祐
七十城之全跨兮徒勤瘁以

奮戮悅事大以請款兮旋掩襲而莫救失蹇據之殢踣
兮潛裹甲以奔走裂衮冕以東適兮甘君子之居陋何
微服之漁耕兮尚新朝之弗容奉檄命以西覲兮奄中
路以舍生雖恚懷之自迫兮僉深憫其弗平值炎劉之
天授兮焉責王之無功顧同時之提劍兮誰知乎成敗
之形昔太王之去邠兮孟子稱述以告滕土地豈厥弗
欲兮脫我黎庶於兵鋒設爾幸生於平世兮諒可以為
善國觀多士為之死兮聿輝映於史冊含悲咽以營葬

兮嘉祔殉之二客慨從容以處死兮九時流之匪易迨
海嶠之聞訃兮同刳斃者五百將衆多之少疑兮憑良
史之真蹟快漢廷之亡憂兮庸三齊之屯厄嗟乎女悅
已以適容蹟委質於相知遙辭家而許君兮誓鞠瘁以
相隨豈山川四顧之罔避兮寧漢京之不可馳誰之
猶詠迫劫兮異其猶滅而瘖迷想荒屋之相枕藉兮孰
蘩裡而掩尸海若殆為之鼓盪兮山靈亦為之淒悲世
遠尚言之太息兮矧挽悼於當時昔孟嘗之多食客兮

猶得力於馮驩漢高之緩爵賞兮功臣已聚謀於沙間
淮陰之縛於陳兮楚士誰為之明冤夫義合詎保其心
貌兮矧顛沛之周旋若人情之竭盡兮孰不為死之至
難不識橫之何道兮羣士紛為之喪元曩東陟於牢山
兮眺壘址紆其延攣詢島名曰嗚呼兮野叟惘惘而無
言招堂堂英魂兮眷故國以言旋無全文之紀述兮僅
附見其大端噫多士之死以安兮缺誅誌以奚妨山岳
岳以摩霄兮水濺濺其汪洋多吾國之貞烈兮欽芳懿

之可忘粵覆載之濟濟紛紛兮孰齡算之獨長彼戰勝
以創興兮等大塊之亡羊千載旅墳之歧蕪兮名賢慨
稱其耿光竊謂君王之可以不死兮詘所遇之何傷為
多士之愍悼兮俾考終於遐荒惜一夕激憤之難制兮
遺曠世之惋昵兮悲涼

明文海卷二十

欽定四庫全書

明文海卷二十一

餘姚黃宗義編

賦二十一

哀傷一

閔貞賦

楊守趾

夫何一佳人兮塊獨居而無侶朝悵悵以至暮兮營
營而達曙言我家良而族茂兮幼連娟以好脩珥瑤碧
而佩寶璐兮戴孔雀之搔頭覽薜荔以充幃兮緝蕙蘭

而為凋光陸離其續紛兮芳與澤其雜糅慕闕睢之窈
窕兮異君子之好述籍蹇修以為理兮執高門之箕帚
葛蘿附於松柏兮吾懼夫身輕而厚施覽圖史以自監
兮哀哲婦之傾城思雞鳴之賢耦兮恒警戒而相成繫
靈修之高義兮方採芹於潁池懷青萍與結綠兮俟和
燭其子知將榮耀以貽寵兮矢偕老以為期何大厲之
嫉妬兮羌中道而奪之如涉川而無航兮如凌霄而失
梯豈妾人之殃咎兮抑天命之不可違易珠翹以麻髻

兮代羅裳以總哀泣既盡而繼以血兮心怛絕而復悲
天陰陰其欲雨兮景翳翳而將晡燕飛飛而歸梁兮雞
登時而相呼宵燭黯其無光兮撫孤孩於坐隅搏哀苦
以為枕兮結愁思以為衾依苦席以假寐兮恍若君之
幸臨乍悲喜而欲言兮怛驚悟而惕心猶傾耳以馳想
兮似聞君之聲音終悄悄其閒寂兮哀四壁之蟲吟欲
夜哭而不可兮淚浪浪而不禁朝進拜於殯帷兮奠桂
漿與椒醕芬必弗而不饗兮怛鬱邑余誰語人與歲而

偕進兮暑與寒其代序念死生之異制兮卜宅兆而安
厝薤歌淒其載途兮柳輦儼以即路雪霏霏其交零兮
冰瀟瀟其將泣獸挺走而失羣兮孤雌峙於遠樹抱玄
纁以臨穴兮欲殺身而為殉憐幼稚之重孤兮又低迴
而不忍暮返哭於故宮兮氣奄奄其欲盡何昔日之甘
薺兮今直為此堇荼也哀同室之人兮溘先委於山隅
也倏祥禪之既踰兮人告予以從吉惟夫死為未亡人
兮吾心喪其猶未畢彼媒妁之嬋媛兮迺申申其煩言

曰琴與瑟宜更張兮鏡已破而重圓汝何玃居而自苦
兮終槁死其誰憐曾獻欵余侘祭兮媒莫察予之衷情
烈女不更二夫兮在古訓則明明詠柏舟於共姜兮悲
黃鵠於陶嬰凝妻引斧以斷臂兮梁寡搯刀而殘形冷
女蒙被以流血兮荀氏以衣帶而自經吾悲不及古之
人兮又何能踐乎二庭琰失身於異域兮嗟怨憤其何
如易安自辱於駟僮兮空嘆咤於桑榆苟大節之一虧
兮又何取於雕蟲之緒餘吾亦知娶居之無聊兮忍而

不能辭也將蒼天以誓心兮雖九死而不移也擘松枝
以掩涕兮倚修竹而延佇陋予室之翹翹兮閔鬻子之
良苦勉拮据以綢繆兮雖卒瘡而莫顧歲習習其若頽
兮時冉冉其哀暮哀良人之日遠兮渺英靈其何處命
靈氛以占筮兮召巫陽而問故曰兩美其不終兮孰知
其英靈之所寓匪修文於地下兮將玉樓成而作賦勉
陟降以永素兮或庶幾乎一遇假蓬萊之仙輶兮騷螭
虬而橫鶩邀金母使前導兮招麻姑使為御朝發軔於

扶桑兮余至於湘浦謁重華之二妃兮睇蒼梧之圯
土事同心而相感兮淚斑斑其如雨道岷峨而弭節兮
文君續其來迎余惡其失節於臨邛兮疾驅駕而不停
縱余轡於沙漠兮唾王媼於青丘爾何嬖於二酉兮為
中華之遺羞朝騁燕而莫粦兮遇浣沙之西施憤尤物
之喪邦兮誰將戮乎鴟夷周下土而不見兮將秉雲而
上征封姨先驅以清塵兮娶女從予以揚靈汴天津而
遵河渚兮見河東之織女隔夫君於一水兮亦脈脈而

不能語雖嘉會之不常兮永相望於終古步蟾蜍而入
月兮拜嫦娥於桂下后羿死已千載兮猶孤眠而不嫁
惟廣寒之清光兮照萬古之長夜屬纖阿以啟途兮適
太微之所居羌中心之憤鬱兮將扣閭而問諸蹠何為
而壽兮淵何為而夭共姜賢而早寡兮夏姬姪而三少
莊姜仁而不遇兮嫫母醜而自好惟兩美其必合兮胡
不與之偕老孰主張乎是兮而施之顛倒死者其何之
兮乃冥冥而杳杳將乘化以歸盡兮抑輪迴於六道何

下上而不遇兮增余心之悄悄望閭闔之洞開兮蹇欲
進而躊躇念下土之臣妾兮敢冒昧而干誅申禮義以
抑情兮聊逍遙以自舒回予車以復路兮卒稅駕於故
廬仰旌閭之赫奕兮輪奐輿飛而凌雲金書鬱其焜耀
兮曰表余貞節之門鵷鵠翩其高舉兮隨九霄之鸞羣
願竭忠以趨勞兮報乾坤之渥恩余雖老死而無憾兮
將藉手以見吾良人庶無媿於婦道兮光彤史於千春

哀逝水賦

商輅

哀哉水之為物也浩浩乎窮四海而委形混混乎歷萬川而流行繄蒙泉之始發兮或檻出而旁通洎靈液之啟秘兮亦壑趣而科從上無高之不自兮沂銀潢而為蹤下無深之不入兮渺溟滓而為宮載四游以為極兮涵九提而為封浴兩曜而出入兮吞列宿而渾融彌三湘而漫七澤兮蕩塵靈而浥太空若迺時雨驟集潢汙橫流八埏伊阻平賦悠悠黃河逆上地軸橫抽沮洳成淵絕巘成立禹功莫展丹績奚收及夫青娥告令白收

秉權洞庭葉下吳渚楓妍潢歸潦縮澤枯隰堅海歛而
碕露磧江收而渚呈壩其往奚歸其洩何宣吾但見其
亘古今繼日夜而東馳而日益長往而不舍指虞淵以
為途兮迅方壺而遐征去益遠而返無由兮何西歸之
可憑謂尾閭之復宣兮氣益充而瀉渟遂蒸蔚而上下
兮爰循環而相仍噫有是哉天地之生賴氣以成輕清
上浮重濁下凝浮凝定位乾坤以名流峙羅列二氣之
餘惟斯水也一六之符氣入而盈氣縮而虛窮邃古而

一軌豈斯今之可疑鑒斯流之不返撫人生之胡為羌
朝露之易晞慨夕槿之就萎目睊睊兮若存魂飄飄兮
如馳豈天人之誓歿兮將修與短固有定數數固有之
兮吾且信其必由理而寓理既宰斯兮諒惟善之是留
胡於今之不然兮乃背馳而殊路茲既執款誠而履柔
淑兮獨中道而顛仆將修正之來咎兮抑此數適因時
而畀賦每撫膺而浩歎兮涕橫墜而莫禦噫噓歆閨門
掩兮夜寥寂香徑空兮杳無迹青鸞沒兮金鏡塵寶玦

冷兮沈烟息中鎖空兮伏唯在蘋藻芳兮寧復來哀招
九復兮魂不來白日忽兮掩藹渺深情於溟漠寄逝波
於東海托迅瀾而通勤瀝余衷而莫悔觸余目而增欷
攬予心之芥帶水濺濺兮東馳日杳杳兮西飛送冥鴻
兮三太息夫人一去兮何時歸

擬恨賦

有序 李東陽

予少讀江淹李白所作恨賦愛其為辭而怪所為恨
多閨情閨怨其大者不過興亡之恒運成敗之常事

而已是何感於情亦奚以恨為哉中歲以來更涉世
故記憶舊聞忠臣孝子奇勲盛事或方值幾會遽成
摧毀失之毫釐而終身曠世不可復得至令人吞聲
搥腕而不能已聖賢不言恨然情在天下而不為私
亦天理人事之相感激雖以為恨可也乃效江李體
反其為情以寫抑鬱而卒歸於正知我罪我皆有所
不避云其辭曰

仰視大塊流觀古今撫陳編之磨滅悲往跡之銷沈或

事幾之幸會或禍敗之相尋感志士之涕淚傷善人之
聾瘖若乃國士報怨吞炭漆身遺恨飲器潛身水濱部
馬為之驚跼賊徒為之崩奔奮仇衣於一劍墮怨血於
千春威橫強秦怨深隣國壯士夜奮神椎晝擊山嶽為
之增氣天地為之變色誤失手於副車僅逃形於大索
陳竇秉政誓清濁亂推席定謀露章請斷機事暗泄禁
軍坐畔塞宇宙於烟氛墮衣冠於塗炭昭烈繼絕武侯
託孤勇復漢祚雄吞魏都陳二表之宏略運八陣之奇

謨忽將星之淪落悲帝業之榛蕪武廟將建唐社幾屋
躍少海之潛龍返虞淵之日轂二豎伏法五王就戮功
甫收於樂籠禍終留於机肉建中失母感槩天衷顧衮
衣與玉食嗟欲養而無從誤承歡於別輦翻飲怒於深
宮異百欺於一得竟忍慟而長終金人南下岳侯奮矛
復中原於破竹誓決策於焚舟神禡姦魄天遺國讎痛
長城之自壞委社稷於荒邱朔騎南驅江沙夜駐若兵
力之不支幸潮來之有處海若助庖坤靈失據豈二儀

之翻覆莽萬物之非故已矣乎江山改兮人民非白日
黯兮陰風淒時不可乎再得嘆浮生兮曷歸駭餘聲於
壁碎佇滅景於雲飛事難成而易敗世寡合而多違矢
脩正以俟命孰利鈍之可期庶人定以天勝終幹旋於
化機

東門賦

何景明

步出東門四顧何有敝塚培纍連畛接畝有一男子饑
卧塚首傍有婦人悲挽其手兩人相語似是夫婦夫言

告婦今日何處於此告別各自分去前有大家可為厯
主徑往投之亦自得所我不自存實難活汝婦言謂夫
出言何絕念我與君少小結髮何言中路棄捐決別畢
身奉君不得有越夫聞婦言此言誠難三日無食腸如
朽管仰首鼓喙思得一餐大命旦夕何為遷延即死從
義弗如兩完婦謂夫言爾胡弗詳死葬同溝生處兩鄉
飽為汚人饑為義殤縱令生別不如死將夫愠視妻言
乃執古死生亦大爾何良苦死為王侯不如生為囚擄

朱棺而葬不如生處蓬戶生尚有期死即長腐寤寐黃
泉美諡何補夫婦辯說踟躕良久婦起執夫悲啼掩口
夫揖辭婦收淚西走十聲呼之不一回首

於逝賦

孫宜

蒼蒼孟冬兮草木莽莽緒風振於清原兮滄流淒其迴
蕩攷徘徊而遠顧兮見丘墳之纍纍狐狸卧其側兮豺
狼號其四陲荆棘生而翳壠兮楸松儼以成行念三畝
之是列兮悲九原之若堂進野叟而就問兮曰此故達

人之藏昔夫子之享休兮羌積勢而孰當秉炎威以灼
爍兮屹氷山而造穹蒼於昔鬼神避其力兮日月潛而
莫襲其光或片言而致福兮一語爰以胥戕使玄黃卒
可移兮將覆載為之易設欲轉市而成山兮神人乃於
焉以驅石明珠遠致來越裳兮翠羽焚而羅家謂千齡
之可矢兮曰壽夭而無常朝並齒乎河嶽兮夕乃齊乎
秋霜縱袿襦以為藏兮亦祇益乎裨之度也矧一逝而
不復旋兮是皆他人之數也歲未幾而成墟兮塋龍從

而蓊蕪石麟竊而為砥兮翁仲貽之牧夫審椒漿其孰
莫兮頽鵠彙其嗚呼覽斯土之荒穢兮吾既閔而嘆之
彼權夫之暴骨多槩何如而見之玉魚縹緲留人間兮
銀河蕩而為池三泉湜其既竭兮九京之豁而奚遺死
生之儵忽兮惟大人之遠覽生有義而死有肯兮欲昌
被而不敢攬薜芷以結佩兮寧芙蓉以為裾懼修名之
不立兮老冉冉其無餘使生無益於肯兮吾寧淹而速
化既樹德以培芳兮縱名往而奚詫觀上古之明哲兮

亦率由乎此行循繩墨而不頗兮故雖死而猶生三后
之耿介兮乃遽焉而有稱旦儿儿而無咎兮又奚愧夫
沒身彼司馬之石槨兮世乃夷之非倫原倚石而自沈
兮顧以忠而曜其名使逢肯而可恣兮何堯舜之戒儆
也棄梨棊而無尤兮何以名之準也信夫子之垂涕兮
非緣乎土苟遐武其可慕兮吾將為季札之所醕

傷涯櫬賦

有序 魏學禮

魏子歸自金陵將涉江馬有櫬在湄波時及之哀而

作賦曰

彼江干之汎濫兮胡斯裨之泊茲嗟迅湍其洶涌兮回
波漫而及之骸形戢而未露兮諒魂魄其有知俯舷旁
而遐矚兮式慘慘其興悲粵陳辭以訊之兮子胡為而
致斯將子春秋之故及此兮或嗣續之靡人將子疾在
於骨髓兮或二豎厄而莫振將子若楚纍之沈湘兮乃
控節而殞身將子若魯生之蹈海兮乃憤激而投津將
子懷璧而媒寇兮若道遠而中踣將子引波以潔躬兮

遂與汨而俱入非暮濟而蹶僵兮何既歛而塗泥豈陵
谷之貿遷兮乃隧圯而濱涯嗟白雲之英英兮慘侵肌
以旤沴惟風雨之靡蔭兮又巢壘其羣噬哀櫟夫之衆
觀兮咸惆恍其倏晚哀其欲墮未墮兮令何格乎掩薶
將恐將懼兮行且覲其哀皚吾誠不忍其即溼兮囑僕
夫其徙之行者告余以勿徙兮此實怨而死之官將檢
其棲止兮孰能易而之他嗟作法之弊成兮俾亡者之
臨波顧余無力以庇之兮噫彼魄其奈何

明文海卷二十一